

摘藻堂四庫全書薈要

史部

欽定四庫全書蒼要卷六千一百四十

遼史卷十五

元中書右丞相總裁托克托等修

本紀第十五

聖宗六

二十八年春正月辛亥朔不受賀甲寅如乾陵癸酉奉
安大行皇太后梓宮于乾州殿塗殿二月丙戌宋遣王
隨王儒等來弔祭己亥高麗遣魏守愚等來祭是月遣

左龍虎衛上將軍蕭和卓饋大行皇太后遺物于宋仍遣臨海軍節度使蕭虛列左領軍衛上將軍張宗濟謝宋弔祭三月癸卯上大行皇太后諡為聖神宣獻皇后是月宋高麗遣使來會葬夏四月甲子葬太后於乾陵賜大丞相耶律德昌名曰隆運庚午賜宅及陪葬地五月己卯朔如中京辛卯清暑七金山乙巳西北路招討使蕭托雲奏伐甘州回鶻破肅州盡俘其民詔修士隗口故城以實之丙午高麗西京留守康肇弒其主誦擅

立誦從兄詢詔諸道繕甲兵以備東征秋八月戊申振
平州饑民辛亥幸中京丙寅謁顯乾二陵丁卯自將伐
高麗遣使報宋以皇弟楚國王隆祐留守京師北府宰
相駙馬都尉蕭巴雅爾為都統林牙索諾木為都監九
月乙酉遣使冊西平王李德昭為夏國王辛卯遣樞密
直學士高正引進使韓杞宣問高麗王詢冬十月丙午
朔女直進良馬萬匹乞從征高麗許之王詢遣使奉表
乞罷師不許十一月乙酉大軍渡鴨綠江康肇拒戰敗

之退保銅州丙戌肇復出右皮室許袞耶律迪嚕擒肇
及副將李立追殺數十里獲所棄糧餉鎧伏戊子銅霍
貴寧等州降巴雅爾至努克特嶺遇敵兵戰敗之辛卯
王詢遣使上表請朝許之禁軍士俘掠以政事舍人馬
保佑為開京留守安州團練使旺布為副留守遣太子
大師伊林將騎兵一千送保佑等赴京壬辰守將卓思
正殺遼使者韓喜孫等十人領兵出拒保佑等還遣伊
林領兵擊之思正遂奔西京圍之五日不克駐蹕城西

高麗禮部郎中渤海托實來降庚子遣巴雅爾博諾攻
開京遇高麗兵敗之王詢棄城遁去遂焚開京至清江
還

二十九年春正月乙亥朔班師所降諸城復叛至貴德
州南嶺谷大雨連日馬馳皆疲甲仗多遺棄霽乃得渡
己丑次鴨綠江庚寅皇后及皇弟楚國王隆祐迎于來
遠城壬辰詔罷諸軍己亥次東京二月己酉謁乾顯二
陵戊午所俘高麗人分置諸陵廟餘賜內戚大臣三月

已卯大丞相晉國王耶律隆運薨庚辰皇弟楚國王隆祐權知北院樞密使事樞密直學士高正為北院樞密副使庚寅南京平州水振之己亥以北院大王耶律舒魯為北院樞密使封韓王北院郎君耶律世良為北院大王前三司使劉慎行參知政事兼知南院樞密使事夏四月清暑老古塌五月甲戌朔詔已奏之事送所司附日歷又詔帳族有罪黥墨依諸部人例乙未以劉慎行為南院樞密使南府宰相邢抱質知南院樞密使事

六月庚戌升蔚州知州為觀察使乙卯韓王耶律舒嚕
薨丙辰以南院大王華格為北院樞密使丁巳詔西北
路招討使駙馬都尉蕭托雲安撫西鄙置準布諸部節
度使是秋獵于平地松林冬十月庚子駐蹕廣平淀甲
寅贈大丞相晉國王耶律隆運尚書令謚文忠十一月
庚午朔幸顯州十二月庚子復如廣平淀癸丑以知南
院樞密使事邢抱質年老詔乘小車入朝是月置歸寧
二州是年御試放高承顏等二人及第

開泰元年春正月己巳朔宋遣趙湘符成翰來賀癸未
長白山三十部女直酋長來貢乞授爵秩甲申駐蹕王
子院丙戌望祠木葉山丁亥女直太保佛寧等來朝戊
子獵于瑪哈拉林庚寅祠木葉山辛卯哈斯罕大王呼
勒希來朝二月壬子駐蹕瑞鹿原三月甲戌以蔚州為
觀察不隸武定軍乙亥如葦灤丁丑詔封皇女八人為
郡主乙酉詔卜日行拜山大射柳之禮命北宰相駙馬
蘭陵郡王蕭寧樞密使司空邢抱質督有司具儀物丁

亥皇弟楚國王隆祐徙封齊國王留守東京夏四月庚
子高麗遣蔡忠順來乞稱臣如舊詔王詢親朝壬寅夏
國遣使進良馬己酉祀風伯辛酉以前孟父房詳袞蕭
佛努為左伊勒希巴五月戊辰還上京詔裴玄感邢祥
知禮部貢舉放進士史簡等十九人及第以駙馬蕭紹
宗為鄭州防禦使乙亥以邢抱質為大同軍節度使六
月駐蹕上京七月丙子以耶律遂貞為遼興軍節度使
遂正北院宣徽使張昭瑩南院宣徽使耶律受益上京

副留守寇卿彰德軍節度使命耶律釋紳努李操充賀

宋國生辰信使副蕭尼古齊泰賀宋正旦使副進士康

文昭張素臣郎玄達坐論知貢舉裴玄感邢祥私曲秘

書省正字李萬上書辭涉怨訕皆杖而徒之萬役陷河

冶八月丙申鐵驪納蘇等送烏邑百餘戶至賓州賜絲

絹是日納蘇乞賜佛像儒書詔賜護國仁王佛像一易

詩書春秋禮記各一部己未高麗王詢遣田拱之奉表

稱病不能朝詔復取六州地是月齊國王隆祐薨輟朝

五日冬十月辛亥如中京閏月丁卯贈隆祐守太師謚
仁孝十月甲午朔文武百官加上尊號曰弘文宣武尊
道至德崇仁廣孝聰睿昭聖神贊天輔皇帝大赦改元
開泰改幽都府為析津府薊北縣為析津縣幽都縣為
宛平縣覃恩中外己亥賜夏國使東頭供奉官曹文斌
呂文貴竇珪祐守榮武元正等爵有差癸卯前遼州錄
事張庭美六世同居儀坤州劉興胤四世同居各給復
三年甲辰西北招討使蕭托雲奏七部太師阿勒達因

其部民之怨殺本部節度使巴罕并屠其家以叛準布
執阿勒達以獻而沿邊諸部皆叛十二月丙寅奉遷南
京諸帝石像于中京觀德殿景宗及宣獻皇后于上京
五鸞殿壬申振奉聖州饑民庚辰賜皇弟秦晉國王隆
慶鐵券癸未劉晨言殿中高可垣中京留守推官李可
舉治獄明允詔超遷之甲申詔諸道水菑饑民質男女
者起來年正月日計備錢十文價折傭盡遣還其家歸
州言其居民本新羅所遷未習文字請設學以教之詔

允所請貴德龍化儀坤雙遼同祖七州至是有詔始征
商己丑詔諸鎮建宣教樓

二年春正月癸巳朔以裴玄感為翰林承旨邢祥給事
中石用中翰林學士呂德推樞密直學士張儉政事舍
人邢抱質加開府儀同三司守司空兼侍中王繼忠中
京留守加檢校太師戶部侍郎劉涇加工部尚書駙馬
蕭紹宗加檢校太師耶律琨加政事令封幽王丁未如
瑞鹿原北院樞密使耶律華格封幽王以馬氏為麗儀

耿氏淑儀尚寢白氏昭儀尚服李氏順儀尚功艾氏芳
儀尚儀孫氏和儀己未錄囚烏爾古德呼勒叛古皮室
詳袞延壽率兵討之達旦國兵圍鎮州州軍堅守尋引
去二月丙子詔以麥務川為象雷縣女河川為神水縣
羅家軍為閭山縣山子川為富庶縣習家砦為龍山縣
阿蘭峪為勸農縣松山川為松山縣金甸子為金原縣
壬午遣北院樞密副使高正按察諸道獄三月壬辰朔
華格以西北路畧平留兵戍鎮州赴行在夏四月甲子

拜日詔從上京請以韓斌所括贍國塔魯河奉豪等州
戶二萬五千四百有奇置長霸興仁保和等十縣丙子
如緬山五月辛卯朔復命華格等西討六月辛酉朔遣
中丞耶律資忠使高麗取六州舊城七月壬辰烏爾古
德呼勒復故疆乙未西南招討使政事令色珍奏党項
諸部叛者皆遁黃河北模赧山不叛者哈坦額勒敏兩
部因據其地今復西遷詰之則曰逐水草不早圖之後
恐為患又聞前後叛者多投西夏西夏不納詔遣使再

問西遷之意若歸故地則可就加撫諭使不報上怒欲
伐之遂詔李德昭令党項叛我欲西伐爾當東擊毋失
犄角之勢仍命諸軍各市肥馬丁酉特哩衮耶律迪里
為南府宰相太尉武格為特哩衮癸卯釣魚曲溝戊申
以敦睦宮子錢振貧民己酉華格等破準布酋烏巴之
衆丁卯封皇子宗訓大內特哩衮八月壬戌遣引進使
李延弘賜夏國王李德昭及義成公主車馬己丑耶律
資忠使高麗還冬十月己未朔畋庶井之北命耶律阿

營等使宋賀生辰辛酉駐蹕長灤丙寅詳袞張馬留獻
女直人知高麗事者上問之曰臣三年前為高麗所虜
為郎官故知之自開京東馬行七日有大砦廣如開京
旁州所貢珍異皆積于此勝羅等州之南亦有二大砦
所積如之若大軍行由前路取哈斯罕女直北直渡鴨
淶江並大河而上至郭州與大路會高麗可取而有也
上納之十一月甲午錄因癸丑樞密使幽王華格以西
征有罪削其官封出為大同軍節度使十二月甲子以

北院大王耶律世良為北院樞密使封岐王以宰臣劉晟監修國史牛璘為彰國軍節度使蕭孝穆為西北路招討使放進士鮮于茂昭等六人及第

三年春正月己丑錄囚準布酋長烏巴來朝封為王乙未如渾河丁酉女直及鐵驪各遣使來貢是夕彗星見西方丙午畋潢河濱壬子帝及皇后獵瑞鹿原二月戊午詔增樞密使以下月俸甲子遣上京副留守耶律資忠復使高麗取六州舊地三月庚子遣耶律世良城招

州戊申南京奉聖平蔚雲應朔等州置轉運使夏四月

戊午詔南京管內毋淹刑獄以妨農務癸亥烏爾古叛

乙亥沙州回鶻曹順遣使來貢丙子西北路招討都監

蕭孝穆為北府宰相五月乙酉朔清暑緬山六月乙亥

合巴哩伊實二國舅為一帳伊實伊勒希巴蕭迪里為

詳袞以總之甲申封皇姪呼圖克為廣平郡王是夏詔

國舅詳袞蕭迪里東京留守耶律托實等討高麗造浮

梁于鴨淶江城保宣義定遠等州秋七月乙酉朔如平

地松林壬辰詔政事省樞密院酒間授官釋罪毋即奉
行明日覆奏八月甲寅朔幸沙嶺九月丁酉八部德呼
勒殺其詳袞刷皆叛詔南府宰相耶律烏拉噶招撫之
辛亥釋德呼勒數人令招諭其衆壬子耶律世良獻德
呼勒俘冬十月甲寅朔幸中京丙子以旗鼓伊喇詳袞
特哩袞為奚六部大王放進士張用行等三十一人及
第出身

四年春正月乙酉如瑞鹿原丙戌詔耶律世良再伐達

里塔戊子命詳袞巴古溺水瑞鹿原以備春蒐丁酉獵
馬蘭淀壬寅東征東京留守善寧平章尼嚕古奏已總
大軍及女直諸部兵分道進討遂遣使齎密詔軍前二
月壬子朔如薩堤樂于闐國來貢夏四月癸丑以林牙
建福為北院大王甲寅蕭迪里等伐高麗還丙寅曷蘇
罕部請括女直王蘇扎納戶舊無籍者會其丁入賦役
從之樞密使固寧奏大破八部達里塔詔侍御薩喇獎
諭代行執手之禮丙寅耶律世良等上破準布俘獲數

戊辰駐蹕泂柳湖己巳女直遣使來貢壬申耶律世良
討烏爾古破之甲戌遣使賞有功將校世良討達里塔至
清泥塌時于厥既平朝廷議內徙其衆于厥安土重遷
遂叛世良懲創既破達里塔輒殲其丁壯勒兵渡哈喇
河進擊餘黨斥候不謹其將綑果聚兵稠林中擊遼軍
不備遼軍小却結陣河曲綑果是夜來襲翌日遼後軍
主綑果誘于厥之衆皆遁世良追之軍至險阨綑果方
阻險少休遼軍偵知其所世良不亟掩之綑果輕騎遁

去獲其輜重及所誘于厥之衆併遷達里塔所獲轄麥里部民城臚胸河上以居之是月蕭楊格尚南平郡主五月辛巳命北府宰相劉晟為都統樞密使耶律世良為副殿前都點檢蕭庫哩為都監以伐高麗晟先攜家置邊郡致緩師期追還之以世良庫哩總兵進討以耶律德政為遼興軍節度使蕭年古哩天城軍節度使李仲舉卒詔恤其家六月庚戌上拜日如禮與滿圖古爾世勲易衣馬為好以上京留守耶律巴格為北院樞密

副使秋七月上又拜日遂幸秋山自八月射鹿至于九月復自癸丑至于辛酉連獵于有栢碎石太保響應松山諸山丁卯與伊勒希巴兵部尚書蕭榮寧定交契以重君臣之好丙子以旗鼓伊喇詳袞特哩袞為六部奚王冬十月駐蹕塔喇噶樂十一月庚申詔汰東京僧及命上京中京泊諸宮選精兵五萬五千人以備征東十二月南巡海徼還幸顯州

五年春正月丁未北幸庚戌耶律世良蕭庫哩與高麗

戰于郭州西破之斬首數萬級盡獲其輜重乙卯師次
南海軍耶律世良薨于軍癸酉駐蹕雪林二月己卯阻
卜長來朝辛巳如薩堤灤庚寅前東京統軍使耶律韓
留為右伊勒希巴戊戌皇子宗真生三月乙卯布古德
長蘇布特薩喇等來貢辛酉諸道獄空詔進階賜物丙
寅以前北院大王耶律敬溫為額珍尼郭齊哈党項魁
可來降夏四月乙亥振招州民戊寅左伊勒希巴蕭和
卓為北院樞密使赫勒訥為副使庚辰清暑孤樹淀五

月甲子尚書蕭姬隱生出使後期削其官丁亥以耿元
吉為戶部使六月以政事舍人吳克昌按察霸州刑獄
丁丑回鶻獻孔雀秋七月甲辰獵于赤山八月丙子幸
懷州有事于諸陵戊寅還上京九月癸卯皇弟南京留
守秦晉國王隆慶來朝上親出迎勞至寶德山因同獵
于松山乙丑駐蹕杏堦冬十月甲午封秦晉國王隆慶
長子察克中山郡王次子蘇克樂安郡王十一月辛丑
以參知政事馬保忠同知樞密院事監修國史丁巳以北

面林牙蕭威烏克為國舅詳袞十二月乙酉秦晉國王
隆慶還至北安薨訃聞上為哀慟輟朝七日丁酉宋遣
張遜王承德來賀千齡節是歲放進士孫傑等四十八
人及第

六年春正月癸卯如錐子河二月甲戌以公主賽格殺
無罪婢駙馬蕭托雲不能齊家降公主為縣主削托雲
同平章事丁丑詔國舅帳詳袞蕭威烏克將本部兵征
高麗其國舅司事以都監攝之庚辰以南面林牙聶赫

為南院大王三月乙巳如顯州葬秦晉國王隆慶有事
于顯乾二陵追冊隆慶為太弟夏四月辛卯封隆慶少
子謝嘉努為長沙郡王以樞密使漆水郡王耶律制心
權知諸行宮都部署事壬辰禁命婦再醮丙申如涼陁
五月戊戌朔樞密使蕭和卓為都統漢人行宮都部署
王繼忠為副殿前都點檢蕭庫哩為都監以伐高麗翌
日賜和卓劔俾得專殺丙午錄囚己酉設四帳都詳袞
甲寅南京統軍使蕭惠為右伊勒希巴乙卯祠木葉山

潢河乙丑駐蹕九層臺六月戊辰朔德妃蕭氏賜死葬
兔兒山西後數日大風起塚上晝暝大雷電而雨不止
者踰月是月南京諸縣蝗秋七月辛亥如秋山遣禮部
尚書劉京翰林學士吳叔達知制誥仇正已起居舍人
程勣吏部員外郎南承顏禮部員外郎王景運分路按
察刑獄辛酉以西南路招討請置寧仁縣于勝州九月
庚子還上京以皇子舒蘇生大赦丁未以駙馬蕭璉節
度使華格知制誥仇正已楊佺充賀宋生辰正旦使副

乙卯蕭和卓等攻高麗興化軍不克還師冬十月丁卯
南京路饑輓雲應朔弘等州粟振之辛未獵鏹子河庚
寅駐蹕達哩山十一月乙卯建州節度使石匡弼卒十
二月丁卯上輕騎還上京戊子宋遣李行簡張信來賀
千齡節翌日宋馮元張綸來賀正旦

遼史卷十五

遼史卷十五考證

聖宗紀六開泰元年八月己未高麗王詢遣田拱之奉
表稱病不能朝詔復取六州地 按六州地史未詳
其名考通鑑初以鴨綠江北予高麗嘗築六城至是
復取之

開泰四年夏四月甲寅蕭迪里等伐高麗還 按通鑑
綱目契丹遣迪里討高麗高麗與女直設奇邀擊契
丹大敗而還此不書敗諱之也

五月辛巳命北府宰相劉晟為都統樞密使耶律世良
為副殿前都點檢蕭庫烈為都監以伐高麗 按遼
史高麗傳劉晟作愼行蕭庫烈作蕭虛烈

遼史卷十五考證

欽定四庫全書蒼要卷六千一百四十一

遼史卷十六

元中書右丞相總裁托克托等修

本紀第十六

聖宗七

七年春正月甲辰如達里山二月乙丑朔拜日如渾河
三月辛丑命東北伊埒圖博和哩鄂羅木富珠哩鐵驪
等五部歲貢貂皮六萬五千馬三百丙午烏爾古節度

使蕭善達討叛命迪里臧之夏四月拜日丙寅振川饒
二州饑辛未振中京貧乏癸酉禁匿名書壬辰以三司
使呂德懋為樞密副使閏月壬子以蕭進忠為彰武軍
節度使兼五州制置戊午吐蕃王巴爾遜奏凡朝貢乞
假道夏國從之五月丙寅皇子宗真封梁王宗元永清
軍節度使宗簡右衛大將軍宗愿左驍衛大將軍宗偉
右衛大將軍皇姪宗範昭義軍節度使宗熙鎮國軍節
度使宗亮絳州節度使宗弼濮州觀察使宗奕曹州防

禦使宗顯宗蕭皆防禦使以張儉守司徒兼政事令六月丙申品達囉克部節度使博羅哩至必繖河遇微雨忽天地晦冥大風飄四十三人飛旋空中良久乃墮數里外博羅哩幸獲免一酒壺在地反不移丙午行大射柳之禮庚申以耶律留寧吳守達使宋賀生辰蕭噶濟馬貽謀使宋賀正旦加平章蕭弘義開府儀同三司尚父兼政事令秋七月甲子詔翰林待詔陳升寫南征得勝圖于上京五鸞殿丁卯富珠哩部來貢九月庚申佛

寧國使奏本國與烏里國封壤相接數侵掠不寧賜詔諭之戊辰詔內外官因事受賕事覺而稱子孫僕從者禁之庚午錄囚括馬給東征軍是月駐蹕土河川冬十月名中京新建二殿曰延慶曰永安壬寅以順義軍節度使石用中為漢人行宮都部署丙辰詔東平郡王蕭巴雅爾為都統殿前都點檢蕭實喇為副統東京留守耶律巴噶為都監伐高麗仍諭高麗守吏能率衆自歸者厚賞堅壁相拒者追悔無及十一月壬戌以呂德懋

知吏部尚書楊又玄知詳覆院劉晟為霸州節度使北
府宰相劉慎行為彰武軍節度使庚辰禁服用明金縷
金貼金戊子幸中京十二月丁酉宋遣呂夷簡曹瑋賀
千齡節是月蕭巴雅爾等與高麗戰於茶陀二河遼軍
失利天雲右皮室二軍沒溺者衆約尼帳詳袞阿克達
客省使卓庫渤海詳袞高清明天雲軍詳袞哈里等皆
死之放進士張克恭等三十七人及第

八年春正月宋遣陳堯佐張羣來賀壬戌鐵驪來貢建

景宗廟于中京封沙州節度使曹順為燉煌郡王二月
丁未以前南院樞密使韓愬為中京留守漢人行宮都
部署王繼忠南院樞密使丙辰祭風伯三月己未以契
丹弘義宮使霍實為興聖宮都部署前雲阿南部節度
使崆郭囉積慶宮都部署左祗候郎君耶律哈斯捷軍
都監乙亥東平王蕭哈納東京留守耶律巴噶國舅平
章事蕭巴雅爾林牙伊濟等討高麗還坐失律數其罪
而釋之己卯詔加征高麗有功渤海將校官壬午閱飛

龍院馬癸未輝發太師塔喇噶來貢丙戌置東京渤海
承奉官都知押班夏四月戊子朔如緬山五月壬申以
駙馬蕭克忠為長寧軍節度使乙亥遷寧州渤海戶于
遼土二河已卯哈斯罕特哩袞阿巴該宰相薩喇來貢
六月戊子錄征高麗戰歿將校子弟已丑以左伊勒希
巴蕭嘉哩為西南面招討使御史大夫蕭伊濟為伊勒
希巴已亥特哩袞耶律哈噶為南府宰相南面林牙耶
律哈瑠為特哩袞癸卯弛達巴山猿嶺採木之禁乙巳以

南皮室軍校等討高麗有功賜金帛秋七月己未征高麗戰歿諸將詔益封其妻庚申以東北路詳袞耶律都木達為北院大王辛酉約囉尼格二奚軍征高麗有功賜金帛癸亥詔準布依舊歲貢馬千七百駝四百四十貂鼠皮萬青鼠皮二萬五千戊辰觀稼己巳輝發部太保莽密來貢庚午觀市曲赦市中繫囚命解寧馬翼充賀宋生辰使副八月庚寅遣郎君赫伯舍等率諸部兵會大軍討高麗九月己巳以石用中參知政事宋遣崔

遵度王應昌賀千齡節壬申錄囚甲戌復錄囚庚辰哈
斯罕特哩袞阿巴該來貢壬午駐蹕土河川冬十月乙
酉詔諸道凡事已斷者每三月一次條奏戊子遣耶律
繼崇鄭玄瑕賀宋正旦癸巳詔橫帳三房不得與卑小
帳族為婚凡嫁娶必奏而後行癸卯以前北院大王建
福為額珍尼果齊哈甲辰改東路和掄台布城為咸州
建節以領之十一月甲寅置雲州宣德縣十二月辛卯
駐蹕中京乙巳以廣平郡王宗業為中京留守大定尹

韓愬為特哩袞辛亥高麗王詢遣使乞貢方物詔納之
九年春正月宋遣劉平張元普來賀二月如鴛鴦灤五
月庚午耶律資忠使高麗還王詢表請稱藩納貢歸所
留王人珠埒哩珠埒哩在高麗六年忠節不屈以為林
牙卒未遣使釋王詢罪並允其請癸酉以耶律宗教檢
校太傅宗誨啓聖軍節度使劉晟太子太傅仍賜保節
功臣秋七月庚戌朔日有食之詔以近臣代拜救日甲
寅遣使賜沙州回鶻燉煌郡王曹順衣物以察喇耿元

吉哈濟宋璋為來年賀宋生辰正旦使副九月戊午以
駙馬蕭紹宗平章事丁卯文武百僚奉表上尊號不許
三上迺從之乙亥沙州回鶻燉煌郡王曹順遣使來貢
括諸道漢民馬賜東征軍以伊勒希巴延寧為兵馬副
都部署總兵東征是月駐蹕金鉞灤宋遣宋綬駱繼倫
賀千齡節冬十月戊寅以聶呼為奚王都監托多羅為
北王府錫里軍詳袞郎君婁使沙州還詔釋宿累國家
舊使遠國多用犯徒罪而有才畧者使還即除其罪戊

子西南招討奏党項部有宋犀族輸貢不時常有他意
宜以時遣使督之詔曰邊鄙小族歲有常貢邊臣驕縱
徵歛無度彼懷懼不能自達耳第遣清慎官將示以恩
信無或侵漁自然效順復奏迪錦達魯特部言節度使
韓留有惠政今當代請留上命進其治狀辛丑如中京
壬寅大食國遣使進象及方物為子察克請婚十一月
丁巳以漆水郡王韓懃為南京留守析津尹兵馬都總
管己未以伊勒希巴蕭孝順為南面諸行宮都部署加

左僕射十二月丁亥禁僧然身煉指戊子詔中京建太祖廟制度祭器皆從古制乙巳詔來年冬行大冊禮放進士張仲舉等四十五人

太平元年春正月丁丑朔宋使魯宗道成吉來賀如渾河二月乙卯幸鉞河壬戌獵高祁林三月戊戌皇子巴雅濟生庚子駙馬都尉蕭紹業建私城賜名睦州軍曰長慶是月大食國王復遣使請婚封王子班郎君和色哩女嚙老為公主嫁之夏四月戊申東京留守奏女直

三十部酋長請各以其子詣闕祇候詔與其父俱來受
約乙卯錄囚丁卯置萊州是月清暑緬山秋七月甲戌
朔賜從獵女直人秋衣乙亥遣古哩取石晉所上玉璽
于中京準布來貢辛巳如沙嶺是月獵黃河九月幸中
京冬十月丁未德呼勒酋長普爾普來貢馬駝戊申錄
囚甲寅宋使李懿王仲賓賀千齡節蘇惟甫周鼎賀來
歲元正即遣蕭善程翥報聘党項長赫嚕來貢己未以
薩滿嘉哩為都點檢郭囉副點檢耶律羅漢努左皮室

詳袞桑古右皮室詳袞拉拉西北路金吾耶律昇音御
史大夫球格駙馬都尉蕭崇古嚕並大將軍庚申幸通
天觀觀魚龍曼衍之戲翌日再幸還升玉輅自內三門
入萬壽殿奠酒七廟御容因宴宗室十一月癸未上御
昭慶殿文武百僚奉冊上尊號曰睿文英武遵道至德
崇仁廣孝功成治定昭聖神贊天輔皇帝大赦改元太
平中外官進級有差宋遣使來聘夏高麗遣使來貢甲
申冊皇子梁王宗真為皇太子

二年春正月如納水釣魚二月辛丑朔駐蹕魚兒灤三月甲戌如長春州丁丑宋使薛貽廓來告宋主恒殂子禎嗣位遣都點檢耶律昇音等充宋祭奠使副林牙蕭日新觀察馮延休充宋后弔慰使副戊寅遣金吾耶律錫林引進姚居信充宋主弔慰使副戊子為宋主飯三京僧是月地震雲應二州屋摧地陷鄂博山裂數百步泉湧成流夏四月如緬山清暑五月乙亥朔參知政事石用中薨庚辰鐵驪遣使獻烏色十六戶六月己未宋

遣使薛由等來饋其先帝遺物秋七月己卯以耶律信

寧為奉陵軍節度使高麗國參知政事王同顯靜海軍

節度使耶律遂忠長寧軍節度使耿延毅昭德軍節度

使高守貞河西軍節度使九月癸巳遣尚書昇音韓格

賀宋主即位冬十月壬寅遣堂後官張克恭充賀夏國

王李德昭生日使耶律縑古韓王充賀宋太后生日使

副耶律仙寧史克忠充賀宋正旦使副是月駐蹕和爾

郭斯浞癸卯朔賜宰臣呂德懋參知政事吳叔達樞密

副使楊又玄右丞相馬保忠錢物有差辛亥至上京曲赦畿內囚十一月丙戌宋遣使來謝十二月辛丑高麗王詢薨其子欽遣使來報即命使冊欽為高麗國王甲寅宋遣劉煜郭志言來賀千齡節是年放進士張漸等四十七人

三年春正月丙寅朔如納水釣魚以昇音為平章事乙亥以蕭臺德為南王府都監林牙耶律信寧西北路招討都監辛巳賜越國公主私城之名曰懿州軍曰慶懿

二月丙申以丁振為武信軍節度使改封蘭陵郡王戊申以東平郡王蕭巴雅爾為西南面都招討封幽王夏四月以耶律守寧為都點檢五月清暑緬山六月戊申以南院宣徽使劉涇參知政事蕭孝惠為副點檢蕭孝恭東京統軍兼沿邊巡檢使戊午以蕭璉為左伊勒希巴蕭琳為詳袞秋七月戊寅以南府宰相耶律哈噶為上京留守封漆水郡王丙戌以皇后生辰為順天節丁亥賜緬山名曰永安是月臘赤山閏月壬辰以蕭伯達

韓紹雍充賀宋正旦使副唐古特程昭文賀宋生辰使副冬十月庚辰宋遣薛奎郭盛賀順天節王臻慕容惟素賀千齡節東征軍奏統帥錫林詳袞課努率師自摩穆克嶺入林牙噶濟禪將大匡逸等率師鼓山嶺入閨月未至達掄河不遇敵而還是月會於哈卜齊勒嶺馳馬死者甚衆駐蹕遼河十一月辛卯朔以皇姪宗範為歸德軍節度使北府宰相蕭孝穆南京留守封燕王南京留守韓愬南院大王兵馬都總管仇正燕京轉運使

十二月壬戌以宗範為平章事封三韓郡王仇道衡中
京副留守馮延休順州刺史郎玄化西山轉運使趙其樞
密直學士丁郊以蕭永為太子太師己郊封皇子重元
秦國王

四年春正月庚寅朔宋遣張傳張士禹程琳丁保衡來
賀如鴨子河二月己未朔獵塔魯河詔改鴨子河曰混
同江塔魯河曰長春河三月戊子朔千齡節詔賜諸宮
分耆老食夏四月癸酉以丞相馬保忠子世弘使嶺表

至平地松林為盜所殺特贈昭信軍節度使五月清暑
永安山己未南院大王韓愬薨戊辰以鄭弘節為兵部
郎中劉慎行順義軍節度使辛未以燕王蕭孝穆子順
為千牛衛將軍甲戌以中山郡王察克為保靜軍節度
使樂安郡王蘇克廣德軍節度使蕭嘉哩彰德軍節度
使庚辰以遼興軍節度使周王呼圖克為臨海軍節度
使漆水郡王迪里南院大王秋七月如秋山八月丙辰
以韓紹芳為樞密直學士駙馬蕭必塔都點檢九月以

駙馬蕭紹宗為武定軍節度使耶律宗福安國軍節度使冬十月駐蹕遼河宋遣蔡齊李用和來賀千齡節十一月追封南院大王韓勰為陳王十二月以蕭從政為歸義軍節度使康筠監門衛充賀宋正旦使副是年放進士李烱等四十七人

遼史卷十六

遼史卷十六考證

聖宗開泰七年三月辛丑命富珠哩部歲貢貂皮六萬
五千馬三百 按富珠哩舊作蒲奴里營衛志又作
盆奴里今畫一改

開泰七年六月丙申丙午 按丙申上原本無六月二
字考歷象志朔考是年五月壬戌朔不應有丙申丙
申六月五日也又原本丙午上有八月二字以八月
直接五月而下文乃書秋七月八月不應在七月之

前且考是年八月庚寅朔而紀內丙午之下復紀庚申庚申為九月朔下文亦已標明更非八月所應有蓋丙午丙申均係六月原本訛六為八而又以應在丙申之上者誤在丙午上也今并據改

開泰八年八月庚寅遣郎君赫伯舍等率諸部兵會大軍討高麗 按赫伯舍舊作曷不式考高麗外紀又作曷不呂今畫一改

開泰八年九月庚辰阿巴諛來賀 按阿巴諛舊作阿

不葛此處復作阿不割今畫一改

太平元年冬十月甲寅 按甲寅原本作甲子考戊申
已未之中不應有甲子蓋係甲寅之誤今改

太平二年六月已未 按已未原本作乙未考朔考是
年六月已亥朔與乙未相距五十七日蓋已與乙相
似沿寫之訛耳今改

遼史卷十六考證

欽定四庫全書蒼要卷六千一百四十二

遼史卷十七

元中書右丞相總裁托克托等修

本紀第十七

聖宗八

五年春正月乙酉如混同江二月戊午禁天下服用明
金及金線綺國親當服者奏而後用是月如魚兒灤三
月壬辰以左丞相張儉為武定軍節度使同政事門下

平章事鄭弘節臨潢少尹劉慎行遼興軍節度使武定
軍節度使蕭必塔契丹行宮都部署樞密副使楊又玄
吏部尚書參知政事兼樞密使是月如長春河魚兒灤
其水一夕有聲如雷越沙岡四十里別為一陂夏五月
清暑永安山以蕭從順為太子太師吳叔達翰林學士
道士馮若谷加太子中允耶律晟武定軍節度使張儉
彰信軍節度使呂士宗禮部員外郎李可舉順義軍節
度使秋七月獵平地松林九月駐蹕南京己亥以蕭迪

里李紹琪充賀宋太后生辰使副耶律守寧劉四端充
賀宋主生辰使副冬十月辛未宋太后遣馮元宗史方
來賀順天節十一月庚子幸內果園宴京民聚觀求進
士得七十二人命賦詩第其工拙以張昱等一十四人
為太子校書郎韓欒等五十八人為崇文館校書郎辛
丑以左祗候郎君詳袞蕭羅羅為右伊勒希巴十二月
丁巳以漢人行宮都部署蕭孝先為上京留守皇姪長
沙郡王謝嘉努匡義軍節度使耶律仁舉興國軍節度

使甲子蕭守寧為點檢侍衛親軍馬步軍乙丑北院樞

密使蕭和卓薨戊辰以北府宰相蕭布庫為北院樞密

使己巳遣蕭諧李琪充賀宋正旦使副庚午以參知政

事劉京為順義軍節度使乙亥宋使李維張綸來賀千

齡節是歲燕民以年穀豐熟車駕臨幸爭以土物抒誠

貢獻上禮高年惠鰥寡賜酺飲至夕六街燈火如晝士

庶嬉遊上亦微行觀之丁丑禁工匠不得銷毀金銀器

六年春正月己卯朔宋遣徐奭裴繼起張若谷崔準來

賀庚辰如鴛鴦灤二月己酉以密喇濟同知樞密院黃
翩為兵馬都部署達噶濟副之霍實為都監引軍城混
同江蘇默河之間黃龍府請建堡障三烽臺十詔以農
隙築之東京留守巴噶奏黃翩領兵入女直界徇地俘
獲人馬牛豕不可勝計得降戶二百七十詔獎諭之戊
午以耶律頁為副點檢以國舅帳蕭瑠實圖嚕庫領西
北路十二班軍奚王府錫里軍己巳南京水遣使振之
庚午詔党項別部塔斯設契丹節度使治之三月戊寅

以大同軍節度使張儉入為南院樞密使左丞相兼政
事令參知政事吳叔達責授將作少監出為東州刺史
準布來侵西北路招討使蕭惠破之夏四月丁未朔以
武定軍節度使耶律海古勒為特哩袞戊申博囉滿達
部多烏舍戶詔索之丙寅如永安山五月辛卯以東京
統軍使蕭縑古為契丹行宮都部署癸卯遣西北路招
討使蕭惠將兵伐甘州回鶻六月辛丑詔凡官畜竝印
其左以識之秋七月戊申獵黑嶺八月蕭惠攻甘州不

克師還自是準布諸部叛遼軍與戰皆為所敗監軍尼
魯古國舅帳太保哈布爾死之詔遣特哩袞耶律鴻觀
林牙華格等將兵討之九月駐蹕遼河許冬十月丙子
哈斯罕諸部長來朝庚辰遣使問夏國與宋交戰之故
辛巳以前南院大王濟魯古為烏爾古德呼勒都詳袞
庚寅以蕭孝順蕭紹宗兼侍中駙馬蕭紹業平章政事
前南院大王和多沁同知上京留守安格通化州節度
使乙丑宋遣韓翼田承說來賀順天節十一月戊辰西

北路招討司小校繅古訴招討蕭惠三罪詔都監鄂克
沁按之十二月庚辰哈斯罕部乞建旗鼓許之辛巳詔
北面諸部廉察州縣及錫林密拉之官不治者罷之詔
大小職官有貪暴殘民者立罷之終身不錄其不廉直
雖處重任卽伐之能清勤自持者在卑位亦當薦拔其
內族受賂事發與常人所犯同科戊戌遣杜防蕭蘊充
賀宋生辰使副庚子駐蹕遼河

七年春正月壬寅朔宋遣張保維孫繼業孔道輔馬崇

至來賀如混同江辛亥以女直伯埒為特哩袞佛門為
葉穆部太師甲寅博囉滿達遣使來貢夏四月乙未獵
黑嶺五月清暑永安山西南路招討司奏陰山中產金
銀請置冶從之復遣使循遼河源求產金銀之所六月
禁諸屯田不得擅貨官粟癸巳詔蕭惠再討準布秋七
月巳亥朔詔更定法令庚子詔諭駙馬蕭楚布公主諾
木格爾於后有父母之尊后或臨幸祇謁先祖祇拜空
帳失致敬之禮今後可設像拜謁乙巳詔輦路所經旁

三十步內不得耕種者不在訴訟之限九月駐蹕遼河
冬十月丁卯朔詔諸帳院庶孽竝從其母論貴賤十一
月宋遣石中立石貽孫來賀千齡節王博文王雙賀順
天節辛亥以楊又玄邢祥知貢舉乙未匡義軍節度使
中山郡王察克保寧軍節度使長沙郡王謝嘉努廣德
軍節度使樂安郡王蘇克奏各將之官乞選伴讀書史
從之癸亥以三韓王欽為啓聖軍節度使楊佶刑部侍
郎甲子以左千牛衛上將軍耶律古裕為北院大王十

二月丁卯遣耶律蘇頁王永錫充賀宋太后生辰蕭蘇色馬保永充賀正旦使副癸酉以金吾蕭噶嚕為奚錫里軍詳袞

八年春正月己亥如混同江庚申党項侵邊破之甲子詔州縣長吏勸農二月戊子燕京留守蕭孝穆乞于拒馬河接宋境上置戍長巡察詔從之三月駐蹕長春河夏五月清暑永安山六月以韓寧劉湘充賀宋太后生辰使副吳克荷充賀夏國王李德昭生辰使癸巳權北

院大王耶律哲魯奏今歲十一月皇太子納妃諸族備會親之帳詔以豪盛者三十戶給其費秋七月丁酉以約尼帳郎君辰格為西北路巡檢與蕭錫林同管二招討地以南院大王耶律迪里為上京留守戊戌獵平地松林九月壬辰朔以渤海宰相羅漢權東京統軍使壬子幸中京北德呼勒節度使耶律延壽請視諸部賜旗鼓詔從之癸丑準布別部長呼蘭來降乙卯準布長春古來降冬十月宋遣唐肅葛懷愍來賀順天節樞密使

魏王耶律色珍孫婦阿古指斥乘輿其孫古欲為之隱
事覺乃竝坐之仍籍其家詔燕城將士若敵至總管備
城之東南統軍守其西北馬步軍備其野戰統軍副使
繕壁壘課士卒各練其事十一月丙申皇太子納妃蕭
氏以耶律求翰為北院大王冬十二月辛酉朔以約尼
太尉色佛呼為天雲軍詳袞壬申以前北院大王耶律
留寧為雙州節度使康筠崇德宮都部署色實永興宮
都部署埒富宜州節度使

闕

菴遼州節度使耶律頁曰

知中京留守耶律哈喇托輝為大將軍丁丑詔庶孽雖
已為良不得預世選丁亥宋遣寇瑛康德來賀千齡節
朱諫曹英張逸劉永釗賀來歲兩宮正旦詔兩國舅及
南北王府乃國之貴族賤庶不得任本部官是歲放進
士張宥等五十七人

九年春正月至自中京二月戊辰遣使賜高麗王欽物
如烏林河夏五月清暑永安山六月戊子以長沙郡王
謝嘉努為廣德軍節度使樂安郡王蘇克匡義軍節度

使中山郡王察克保定軍節度使進封潞王豫章王特
布長寧軍節度使以耶律思忠耶律荷耶律曷約尼色
佛呼陳邈韓紹一韓知白張震充賀宋兩宮生辰及來
歲正旦秋七月戊午朔如黑嶺八月己丑東京錫里軍
詳袞大延琳囚留守駙馬都尉蕭孝先及南陽公主殺
戶部使韓紹勲副使王嘉四捷軍都指揮使蕭佛德延
琳遂僭位號其國為興遼年為天慶初東遼之地自神
冊來附未有權酤鹽麴之法關市之征亦甚寬弛馮延

休韓紹勲相繼以燕地平山之法繩之民不堪命燕又仍歲大饑戶部副使王嘉復獻計造船使其民諳海事者漕粟以賑燕民水路艱險多致覆沒雖言不信鞭楚撈掠民怨思亂故延琳乘之首殺紹勲嘉以快其衆延琳先事與副留守王道平謀道平夜棄其家踰城走與延琳所遣召黃龍府黃翩者俱至行在告變上即徵諸道兵以時進討時國舅詳袞蕭必塔治近延琳先率本管及家兵據其要害絕其西渡之計渤海太保夏行美

亦舊主兵戍保州延琳密馳書使圖統帥耶律布庫行
美乃以實告布庫得書遂殺渤海兵八百人而斷其東
路延琳知黃龍保州皆不附遂分兵西取瀋州其節度
使蕭旺祿初至其副張傑聲言欲降故不急攻及知其
詐而已有備攻之不克而還時南北女直皆從延琳高
麗亦稽其貢及諸道兵次第皆至延琳嬰城固守冬十
月丙戌朔以南京留守燕王蕭孝穆為都統國舅詳袞
蕭必塔為副統奚六部大王蕭博諾為都監以討之十

一月乙卯朔如顯陵丙寅以瀋州節度副使張傑為節
度使其防城進士張人紀趙陸等二十二人入朝試以
詩賦皆賜第超授保州戍將夏行美平章事壬申以駙
馬劉四端權知宣徽南院事十二月丁未宋遣仇永韓
永錫來賀千齡節命耶律育吳克荷蕭可觀趙利用充
賀宋生辰使副耶律元吉崔閏蕭昭古竇振充來歲賀
宋正旦使

十年春正月乙卯朔宋遣王夷簡竇處約張易張士宜

來賀二月幸龍化州三月甲寅朔詳袞蕭必塔至自遼
東言都統蕭孝穆去城四面各五里許築城堡以圍之
駙馬延寧與其妹穴地遁去公主吹巴勒在後為守陴
者覺而止夏四月如乾陵以耶律行平為廣平軍節度
使夏行美為中順軍節度使李延弘知易州蕭從順加
太子太師五月戊申清暑栢坡秋七月壬午詔來歲行
貢舉法八月丙午東京賊將楊詳世密送款夜開南門
納遼軍擒延琳渤海平冬十月駐蹕長寧淀十一月辛

亥南京留守燕王蕭孝穆以東征將士凱還戎服見上
上大加宴勞翌日以孝穆為東平王東京留守國舅詳
袞駙馬都尉蕭必塔封蘭陵郡王奚王博諾加侍中以權
燕京留守兼侍中蕭惠為燕京統軍使前統軍威烏克
大將軍節度使宰相兼樞密使馬保忠權知燕京留守
奚王府都監蕭阿克展東京統軍使詔渤海舊族有勲
勞材力者叙用餘分居來隰遷閩等州十二月乙巳宋
遣梅詢王令傑來賀千齡節漆水郡王耶律迪里加尚

父烏爾古節度使蕭普達為伊實部大王尚書左僕射
蕭琳為臨海軍節度使

十一年春正月己酉朔如混同江二月如長春河三月
上不豫夏五月大雨水諸河橫流皆失故道六月丁丑
朔駐蹕大福河之北己卯帝崩于行宮年六十一在位
四十九年景福元年閏十月壬申上尊諡曰文武大孝
宣皇帝廟號聖宗

贊曰聖宗幼冲嗣位政出慈闈及宋人二道來攻親御

甲冑一舉而復燕雲破信彬再舉而躡河朔不亦偉歟
既而侈心一啓佳兵不祥東有察克圖之敗西有甘州
之喪此狃於常勝之過也然踐阼四十九年理冤滯舉
才行察貪殘抑奢僭錄死事之子孫振諸部之貧乏責
迎合不忠之罪却高麗女樂之歸遼之諸帝在位長久
令名無窮其唯聖宗乎

遼史卷十七

遼史卷十七考證

聖宗太平七年十一月乙未 按朔考是月係丁酉朔
丁酉距乙未五十九日 月內不應有乙未日 以上辛
亥下癸亥計之當是乙卯或巳未之訛 因無他書據
改姑仍其舊

太平九年十一月丙寅以瀋州節度副使張傑為節度
使其防城進士張人紀趙陸等二十二人入朝 按
防城原本訛皇城與下入朝文義不屬張人紀等蓋

與張傑同守瀋州拒大延琳者故與張傑夏行美同
加恩擢今据永樂大典改

太平十年春正月乙卯朔 按朔考是月係乙卯朔以
上年十一月乙卯朔推之閱兩月大盡應得乙卯日
原本誤作巳卯今改

遼史卷十七考證



總校官原候補知府臣葉佩蓀

校對官編修臣吳錫麒

謄錄監生臣孫樹新

欽定四庫全書蒼會要

史部
遠史卷
二十八至
二十四

詳校官祭酒臣韋謙恒



欽定四庫全書薈要卷六千一百四十三

遼史卷十八

元中書右丞相總裁托克托等修

紀第十八

興宗一

興宗神聖孝章皇帝諱宗真字雅布濟小字濟古爾聖宗長子母曰欽哀皇后蕭氏上始生齊天皇后養之幼而聰明長而魁偉龍顏日角豁達大度善騎射好儒術



通音律三歲封梁王太平元年冊為皇太子十年六月
判北南院樞密使事十一年六月己卯聖宗崩即皇帝
位於樞前壬午尊母元妃蕭氏為皇太后甲申遣使告
哀于宋及夏高麗是年御宣政殿放進士劉貞等五十
七人辛卯大赦改元景福乙未奉大行皇帝梓宮殯于
永安山太平殿辛丑皇太后賜駙馬蕭哲伯埒蕭必塔
死圍場都太師女直珠格爾右祗候郎君詳袞蕭雅魯
等七人棄市籍其家遷齊天皇后于上京秋七月丙午

朔皇太后率皇族大臨于太平殿高麗遣使弔慰上召

晉王蕭布庫等飲博夜分乃罷丁未擊鞠戊申以耶律

罕巴為左伊勒希巴特穆爾為左祇候郎君詳袞橫帳

郎君樂古權右祇候郎君詳袞己酉以耶律哲魯為于

厥廸里都詳袞高八為右皮室詳袞庚戌賑薊州民饑

癸丑詔寫大行皇帝御容甲寅錄囚以觀察姚居信為

上將軍建慶州于慶陵之南徙民實之充奉陵邑乙卯

以此歲豐稔罷給東京統軍司糧丁巳上謁大行皇帝

御容哀慟久之因詔寫北府宰相蕭孝先南府宰相蕭孝穆象于御容殿以蕭阿克展為東京留守丁卯謁太平殿焚先帝所御弓矢幸晉王蕭布庫第視疾辛未錄囚壬申上謁神主帳時威蕭氏始入宮亦命拜之八月壬午遷大行皇帝梓宮於菽塗殿九月戊申躬視慶陵庚戌問安于皇太后辛亥宋遣王隨曹儀致祭王醴許懷信梅詢張綸來慰兩宮范諷孫繼業賀即位孔道輔魏昭文賀皇太后冊禮戊午焚弧矢鞍勒于菽塗殿庚

申夏國遣使來慰庚午以宋使弔祭喪服臨菽塗殿甲
戌遣御史中丞耶律翥司農卿張確詳袞耶律勵四方
館使高維翰謝宋弔慰冬十月戊寅宰臣呂德懋薨癸
未殺哲伯孛黨彌勒努觀音努等丙戌遣工部尚書高
德順崇祿卿李可封致先帝遣物于宋以右領軍衛上
將軍耶律遜少府監馬憚充皇太后謝宋使右監門衛
上將軍耶律元載引進使魏永充皇帝謝宋使丁酉夏
國遣使來賻戊戌以蕭葦趙為果耶律郁馬保業充來

歲賀宋正旦使閏月辛亥謁菽塗殿閱玄宮闕器有司
請以生辰為永壽節皇太后生辰為應聖節從之辛酉
閱新造鎧甲丁卯振黃龍府饑民十一月壬辰上率百
僚奠于菽塗殿出大行皇帝服御玩好焚之縱五坊鷹
鷂甲午英文武大孝宣皇帝于慶陵乙未祭天地問安
皇太后丙申謁慶陵以遺物賜羣臣名其山曰慶雲殿
曰望仙十二月癸丑至自慶陵皇太后聽政帝不親庶
務羣臣表請不從是歲以興平公主下嫁夏國王李德

昭子元昊以元昊為夏國公駙馬都尉

重熙元年春正月壬申朔皇太后御正殿受帝與羣臣
朝宋遣任布王遵範陳琰王克善來賀乙亥宋遣鄭向
郭遵範來賀永壽節丁丑如雪林二月大蒐三月壬申
朔尚父漆水郡王迪里復為特哩衮是春皇太后誣齊
天皇后以罪遣人即上京行弒后請具浴就死許之有
頃后崩夏四月乙巳清暑巴納登秋七月獵平地松林
以蕭達溥王英秀蕭麓張素羽充來歲賀宋正旦生辰

使八月丙午駐蹕拉河源皇子洪基生冬十月己酉幸
中京十一月己卯帝率羣臣上皇太后尊號曰法天應
運仁德章聖皇太后羣臣上皇帝尊號曰文武仁聖昭
孝皇帝大赦改元重熙癸未宋遣劉隨王德本來賀應
聖節以楊佖為翰林承旨丙戌夏國遣使來賀辛卯五
國酋長來貢夏國王李德昭薨冊其子夏國公元昊為
夏國王十二月庚戌宋遣胥偃王從益崔暨張懷志來
賀來歲正旦又遣楊日嚴王克纂來賀永壽節以北大

王耶律求翰同平章事是年放進士劉師貞等五十七人

二年春正月庚辰東幸乙酉夏遣使來貢壬辰女直詳
袞塔雅克率所部來貢宋遣曹琮來告母后劉氏哀章
得象安繼昌來饋母后遺物即遣延昌宮使耶律壽寧
給事中知制誥李奎充祭奠使天德軍節度使耶律卿
寧大理卿和道亨河西軍節度使耶律嵩引進使馬世
卿充兩宮弔慰使秋七月甲子朔以耶律楚高升耶律

迪王惟允充兩宮賀宋生辰使副以耶律師古劉五常
充賀宋來歲正旦使副八月丁酉幸溫泉宮乙卯遣使
閱諸路禾稼冬十一月甲申宋遣劉寶符忠李昭述張
茂實等來謝慰奠十二月乙未宋遣丁度王繼凝來賀
應聖節己酉禁夏國使沿路私市金鐵甲寅宋遣章頻
李懿王冲睦張緯李絃李繼一來賀永壽節及來歲正
旦庚申以北府宰相蕭孝先為樞密使

三年春正月丁卯宋使章頻卒詔有司賻贈命近侍護

喪以歸辛卯如春水二月壬辰以北院樞密使蕭布庫
為東京留守戊申耶律大師努有侍襁褓恩詔入屬籍
夏四月甲寅振伊瑪齊部五月庚申朔清暑沿柳湖是
月皇太后還政于上躬守慶陵六月己亥以蕭布庫為
南院樞密使秋七月戊子朔上始親政以耶律庶徵劉
六符耶律睦薄可父充賀宋來歲正旦使副壬辰如秋
山冬十月己未駐蹕中會川十二月宋遣段少連杜仁
贊來賀來歲正旦楊偕李守忠來賀永壽節

四年春正月庚寅如伊瑪齊里三月乙酉朔立皇后蕭氏夏四月甲寅朔如涼陁五月庚子清暑散水源六月癸丑朔皇子寶信努生以耶律信呂士宗蕭袞郭揆充賀宋生辰及來歲正旦使副秋七月壬午朔獵于黑嶺九月己酉駐蹕長寧淀冬十月如王子城十一月壬午改南京總管府為元帥府乙酉行柴冊禮于白嶺大赦加尚父耶律信寧政事令耶律求翰耆宿贊翊功臣十二月癸丑詔諸軍砲弩弓劍手以時閱習庚申宋遣鄭

戩柴貽範揚日華張士禹來賀永壽節及正旦

五年春正月甲申如魚兒灤樞密使蕭延寧請改國舅
伊實小功帳敞史為將軍從之四月庚申以潞王察克
為南府宰相崇德宮使耶律瑪魯為特哩衮甲子幸后
弟蕭無曲第曲水泛觴賦詩丁卯頒新定條制己巳上
與大臣擊鞠五月甲午南幸丁未如呼圖哩巴山清暑
庚申幸北院大王高十行帳拜奧賜銀絹壬戌詔修南
京宮闕府署秋七月辛丑錄囚耶律巴拜誣其弟韓格

謀殺已有司奏當反坐臨刑其弟泣訴臣惟一兄乞貸

其死上憫而從之九月癸巳獵黃花山獲熊三十六賞

獵人有差冬十月丁未幸南京辛亥曲赦析津府境內

囚壬子御元和殿以日射三十六熊賦幸燕詩試進士

于廷賜馮立趙徽四十九人進士第以馮立為右補闕

趙徽以下皆為太子中舍賜緋衣銀魚遂大宴御試進

士自此始宋遣宋郊王世文來賀永壽節甲子宰臣張

儉等請幸禮部貢院歡飲至暮而罷賜物有差以耶律

祥張素民耶律甫王澤充賀宋生辰正旦使副

六年春正月丁丑西幸三月戊寅以秦王蕭孝穆為北
院樞密使徙封吳王晉王蕭孝先為南京留守夏四月
獵野狐嶺閏月獵龍門縣西山五月己酉清暑炭山以
耶律罕巴為北院大王蕭巴噶左伊勒希巴王子郎君
詳袞布古德林牙簽北面事耶律尼格同簽點檢司甲
寅錄囚以南大王耶律信寧故匿重囚及侍婢贓污命
撻以劍脊奪其官都監坐阿附及侍婢罪皆論死詔貸

之丙辰以耶律信寧為西南路招討使庚申出飛龍廐
馬賜皇太弟重元及北南面侍臣癸亥以上京留守耶
律呼圖克琨為南大王平章事蕭扎拉納上京留守侍
中管寧行宮都部署耶律蒲努寧烏爾古達魯特都詳
袞甲子以上京留守耶律鴻觀為北院大王六月壬申
朔以善寧為殿前都點檢護衛太保耶律和卓兼長寧
宮使蕭額魯哩耶律烏拉噶耶律和尚蕭罕嘉努蕭托
里蕭求翰為各宮都部署上酒酣賦詩吳國王蕭孝穆

北宰相蕭巴薩等皆屬和夜中乃罷己卯祀天地癸未
賜南院大王耶律呼圖克琨命上親製誥詞並賜詩以
寵之丙申以北院大王浩善為南京統軍使秋七月辛
丑朔以北南樞密院獄空賞賚有差壬寅以皇太弟重
元生子賜詩及寶玩器物曲赦死罪以下癸卯如秋山
八月己卯北樞密院言伊濟部民苦其酋帥庫春不法
多流亡詔罷伊濟等五國酋帥以契丹節度使一員領
之冬十月癸酉駐蹕石寶岡十一月己亥朔準布酋長

來貢辛亥以契丹行宮都部署蕭惠為南院樞密使壬子以管寧為南院樞密使蕭縑古諸行宮都部署耶律紐幹哩知南面行宮副部署蕭額魯哩左祇候郎君詳袞耶律和卓右祇候郎君詳袞庚申辛晉國公主行帳視疾封皇子洪基為梁王十二月以楊佖為忠順軍節度使遣耶律幹秦鑑耶律德崔繼芳賀宋生辰及正旦七年春正月戊戌朔宋遣高若訥夏元正謝絳張茂實來賀正旦及永壽節辛丑如混同江二月庚午如春州

乙亥駐蹕東川丁丑高麗遣使來貢壬午幸五坊閱鷹
鶻乙酉遣使慶州問安皇太后三月戊戌朔幸皇太弟
重元行帳壬寅如蒲河淀辛亥夏國遣使來貢甲寅錄
囚夏四月己巳以興平公主薨遣北院承旨耶律庶成
持詔問夏國王李元昊公主生與元昊不睦沒詰其故
己卯獵白馬塢甲申射兔新淀井乙未獵金山遣楊家
進鹿尾茸于大安宮六月乙亥御清涼殿試進士賜邢
彭年以下五十五人第秋七月甲辰錄囚乙巳準布酋

長通特古斯來朝戊申如黑嶺九月丁未駐蹕平定冬

十月甲子朔渡遼河丙寅駐蹕白馬淀壬申錄囚十一

月癸巳朔以耶律元方張泥韓至德蕭傅充賀宋生辰

正旦使副辛丑問安皇太后進珍玩庚申錄囚十二月

召善擊鞠者數十人于東京令與近臣角勝上觀之己

巳以皇太弟重元判北南院樞密使事北府宰相賽音

巴寧再任兼知東京留守事耶律應穩南府宰相察噶

扎大內特哩衮伊實巳帳蕭翰乾州節度使劉六符參

知政事王子帳冠格王子郎君詳袞吹絢大王平州節
度使宰臣張克恭守司空宰臣韓紹芳加侍中特哩袞
耶律瑪魯北院宣徽使傅父耶律喜孫南府宰相癸未
宋遣王舉正張士禹賀永壽節甲申命日進酒于大安
宮致薦慶陵丁亥錄囚非故殺者減科南面侍御準格
爾詐取女直貢物罪死上以有吏能黥而流之女直
八年春正月壬辰朔宋遣韓琦王從益來賀丙申如混
同江觀魚戊戌振丕勒部庚戌乂魚實默里河丁巳禁

朔州鬻羊于宋二月丙子駐蹕長春河夏六月乙丑詔
括戶口秋七月丁巳謁慶陵致奠于望仙殿迎皇太后
至顯州謁園陵還京冬十月駐蹕東京十一月甲午詔
有言北院處事失平擊鍾及邀駕告者悉以奏聞戊戌
朝皇太后召僧論佛法戊申皇太后行再生禮大赦已
酉城長春閏十二月壬辰視吳國王蕭孝穆疾宋遣龐
籍杜贊來賀永壽節

九年春正月丙辰朔上進酒于皇太后宮御正殿宋遣

王拱辰彭再思來賀庚申如鴨子河二月駐蹕魚兒濼
三月辛未以應聖節大赦五月乙卯朔清暑永安山六
月射柳祈雨秋七月癸酉宋遣郭禎以伐夏來聘遣樞
密使杜防報聘丁丑如秋山冬十月癸未朔駐蹕中會
川十一月甲子女直侵邊發黃龍府鐵驪軍拒之宋遣
蘇伸向傅範賀應聖節十二月庚寅以北大王府布魁
帳郎君自言先世與國聯姻許置敝史命本帳蕭呼都
克為之辛卯以所得女直戶置肅州以蕭迪劉三叔耶

律元方王惟吉耶律庶忠孫文昭蕭紹筠秦德昌充賀
宋生辰及來歲正旦使副詔諸犯法者不得為官吏諸
職官非婚祭不得沉酗廢事有治民安邊之畧者悉具
以聞

遼史卷十八

欽定四庫全書蒼要卷六千一百四十四

遼史卷十九

元中書右丞相總裁托克托等修

本紀第十九

興宗二

十年春正月辛亥朔宋遣梁適張從一富弼趙日宣來
賀甲子復遣吳育馮戴來賀永壽節二月庚辰朔詔博
囉滿達部歸哈斯罕戶之没入者使復業甲申北樞密

院言南北二王府洎諸部節度侍衛祇候郎君皆出族
帳既免與民戍邊其祇候事請亦得以部曲代行詔從
其請夏四月詔罷修鴨淶江浮梁及漢兵屯戍之役又
以東京留守蕭薩巴言弛東京擊鞠之禁六月戊寅以
蕭寧耶律坦崔禹稱馬世良耶律仁先劉六符充賀宋
生辰使副耶律庶成趙成耶律烈張旦充來歲賀宋正
旦使副秋七月壬戌詔諸職官私取官物者以正盜論
諸敢以先朝已斷事相告言者罪之諸帳郎君等於禁

地射鹿決三百不徵償小將軍決二百以下及百姓犯者罪同郎君論八月丙戌以醫者鄧延貞治詳袞蕭留寧疾驗贈其父母官以獎之九月辛亥朝皇太后國舅留寧薨庚申皇太后射獲熊上進酒為壽癸亥上獵馬孟山草木蒙密恐獵者誤射傷人命耶律德古各書姓名于矢以志之丙寅夏國獻宋俘以石硬砮太保郭三避虎不射免官冬十月丙戌詔東京留守蕭孝忠察官吏有廉幹清彊者具以名聞庚寅以女直太師塔雅克

為哈斯罕都大王辛卯以皇子庫魯噶里生北宰相駙
馬賽音巴寧迎上至其第飲宴上命衛士與漢人角觝
為樂壬辰飲皇太后殿以皇子生肆赦夕復引公主駙
馬及內族大臣入寢殿劇飲甲午幸中京庚子以駙馬
都尉蕭呼哩為國舅詳袞十一月丙辰回鶻遣使來貢
十二月丙子朔宋遣劉沆王慤來賀應聖節乙未置塔
卓卜酋長以和塔拉為平章事上聞宋設關河治壕塹
恐為邊患與南北樞密吳國王蕭孝穆趙國王蕭固寧

謀取宋舊割關南十縣地遂遣蕭英劉六符使宋庚寅
宋遣張沔侯宗亮薛申侍其濬施昌言潘永照來賀永
壽節及來歲正旦以宣政殿學士楊佖為吏部尚書判
順度軍節度使事丁酉議伐宋詔諭諸道

十一年春正月戊申奉迎皇太后于內殿庚戌遣南院
宣徽使蕭特默翰林學士劉六符使宋取晉陽及瓦橋
以南十縣地且問興師伐夏及汲沿邊疏濬水澤增益兵
戍之故二月壬寅如鴛鴦灤四月甲戌朔頒南征賞罰

令六月乙亥宋遣富弼張茂實奉書來聘以書荅之壬

午御舍涼殿放進士王實等六十四人禁羶銀鬻入宋

秋七月壬寅朔詔盜易官馬者減死論外路官勤瘁正

直者考滿代不治事者即易之八月丙申宋復遣富弼

張茂實奉書來聘乞增歲幣銀絹以書荅之九月壬寅

遣北院樞密副使耶律仁先漢人行宮副部署劉六符

使宋約和是時富弼為上言大意謂遼與宋和坐獲歲

幣則利在國家臣下無與與宋交兵則利在臣下害在

國家上感其言和好始定閏月癸未耶律仁先遣人報
宋歲增銀絹十萬兩匹文書稱貢送至白溝帝喜宴羣
臣于昭慶殿是日振恤三父族之貧者辛卯仁先劉六
符還進宋國誓書冬十一月丁亥羣臣加上尊號曰聰
文聖武英略神功睿哲仁孝皇帝冊皇后蕭氏曰貞懿
宣慈崇聖皇后大赦梁王洪基進封燕國王十二月癸
卯朝皇太后甲辰封皇太弟重元子尼魯古為安定郡
王己酉以宣獻皇后忌日上與皇太后素服飯僧于延

壽憫忠三學三寺辛亥詔蠲預備伐宋諸部租稅一年
壬子以吐渾黨項多鬻馬夏國詔謹邊防己未宋遣賀
正旦及永壽節使居邨帝微服往觀丁卯禁喪葬殺牛
馬及藏珍寶

十二年春正月辛未遣同知析津府事耶律迪里樞密
院都承旨王惟吉諭夏國與宋和壬申以吳國王蕭孝
穆為南院樞密使北府宰相蕭孝忠北院樞密使封楚
王韓國王蕭惠北府宰相同知元帥府事罕巴南院大

王耶律喇實東京留守北樞密院副使耶律仁先同知
東京留守事北面林牙蕭格北院樞密副使甲戌如武
清寨葦淀二月壬寅禁闕南漢民弓矢己酉夏國以加
上尊號遣使來賀甲寅耶律迪里等使夏國還奏元昊
罷兵即遣使報宋三月辛卯幸南京壬辰高麗國以加
上尊號遣使來賀夏四月己亥置輝發部詳袞都監庚
子夏國遣使進馬馳五月辛卯幹魯博囉滿達部二使
來貢失期宥而遣還乙未詔復定禮制是月幸山西六

月丙午詔世選宰相節度使族屬及身為節度使之家
許葬用銀器仍禁殺牲以祭庚戌詔漢人官分戶絕恒
產以親族繼之辛亥準布大王通特古斯弟太尉薩哈
勒來朝丙辰回鶻遣使來貢甲子以南院樞密使吳國
王蕭孝穆為北院樞密使徙封齊國王秋七月丙寅朔
北院樞密使蕭孝忠薨特釋繫囚庚寅夏國遣使上表
請伐宋不從八月丙申謁慶陵辛丑燕國王洪基加尚
書令知北南院樞密使事封燕趙國王戊午以前西北

路招討使蕭塔喇噶為右使勒希巴庚申裕悅耶律鴻

觀薨甲子準布來貢九月壬申朝皇太后謁望先殿壬

午謁懷陵冬十月丁酉駐蹕中會川己亥北院樞密使

蕭孝穆薨追贈大丞相晉國王庚子詔諸路上重囚遣

官詳讞辛亥叅知政事韓紹芳為廣德軍節度使三司

使劉六符長寧軍節度使壬子夏侵黨項遣延昌宮使

高嘉努讓之甲子北府宰相蕭惠為北院樞密使幽王

蘇克為特哩袞特哩袞達魯噶封漆水郡王西北路招

討使樞密副使蕭阿拉同知北院宣徽事出飛龍殿馬
分賜羣臣十一月丁丑追封楚王蕭孝忠為楚國王丁
亥以上京歲儉復其民租稅癸巳朝皇太后十二月戊
申改政事省為中書省

十三年春正月甲子朔朝皇太后戊辰如混同江辛未
獵烏爾袞岡二月庚戌如魚兒灤丙辰以叅知政事杜
防為南府宰相三月丁亥高麗遣使來貢以宣正殿學
士楊佶叅知政事是月置契丹警巡院夏四月己酉遣

東京留守耶律浩善知黃龍府事耶律烏魯斯將兵攻
博囉滿達部甲寅南院大王耶律果實奏黨項等部叛
附夏國丙辰西南面招討都監羅漢努詳袞鄂羅木等
奏山西郡族節度使庫哩以五部叛入西夏乞南北府
兵援送實威寨州戶詔富者遣行餘留屯田天德軍五
月壬戌朔羅漢努奏所發部兵與黨項戰不利招討使
蕭普達四捷軍詳袞張佛奴没于陣李元昊來援叛黨
戊辰詔徵諸道兵會西南邊以討元昊六月甲午準布

酋長烏巴遣其子執元昊所遣來援使烏頁改來乞以

兵助戰從之駐蹕永安山以將伐夏遣延昌宮使耶律

高嘉努告宋丙申詔前南院大王耶律古裕翰林都林

牙耶律庶成等編集國朝上世以來事蹟丙午高麗遣

使來貢丁未錄囚秋七月辛酉香河縣民李宜兒以左

道惑衆伏誅庚午行再生禮庚辰夏國遣使來朝八月

乙未以夏使對不以情羈之丁巳夏國復遣使來詢以

事宜又不以實對答之九月戊辰宋以親征夏國遣余

靖致贖禮壬申會大軍于九十九泉以皇太弟重元北

院樞密使韓國王蕭惠將先鋒兵西征冬十月庚寅祭

天地丙申獲黨項偵人射鬼箭丁酉李元昊上表謝罪

巳亥元昊遣使來奏欲收叛黨以獻從之辛亥元昊遣

使來進方物詔北院樞密副使蕭格迓之壬子軍于河

曲格言元昊親率黨項三部來詔格詰其納叛昔盟元

昊伏罪賜酒許以自新遣之召羣臣議昔以大軍既集

宜加討伐癸丑督數路兵掩襲殺數千人駙馬都尉蕭

呼都克為夏所執丁巳元昊遣使以先被執者來歸詔
所留夏使亦還其國十一月辛酉賜有功將校有差甲
子班師丁卯改雲州為西京辛巳朝皇太后十二月巳
丑幸西京戊戌以北院樞密副使耶律迪里為右伊勒
希巴巳亥高麗遣使來貢戊申蕭呼都克自夏來歸

十四年春正月庚申以侍中蕭實喇為南院統軍使封
遼西郡王庚午如鴛鴦灤壬午以金吾衛大將軍達魯
噶為伊實大王甲申夏國遣使進鶻以常侍鄂克多戰

歿命其子錫呼為帥二月庚子朝皇太后駐蹕薩喇潔
三月己卯宋以伐夏師還遣使來賀四月辛亥高麗來
貢閏五月癸丑清暑永安山六月丁卯謁慶陵己卯準
布大王通特古斯率諸酋長來朝庚辰夏國來貢辛巳
以西南面招討使蕭普達戰歿贈同中書門下平章事
秋七月戊申駐驛中會川冬十月甲子祠祀木葉山十
一月壬午朔回鶻阿爾斯蘭遣使來貢甲辰以同知北
院直徽事蕭阿拉為北府宰相十二月癸丑觀漢軍習

礮射擊刺癸亥決滯獄

十五年春正月乙酉如混同江禁契丹以奴婢鬻與漢人二月乙卯如長春河丙寅博囉滿達界海蘭河戶來附詔撫之三月甲辰朝皇太后乙酉以應聖節減死罪釋徒以下辛卯朝皇太后丁酉高麗遣使來貢詔諸道歲具獄訟以聞夏四月辛亥禁五京吏民擊鞠戊午罷約尼帳戍軍壬戌以北女直詳袞蕭噶嚕為奚六部大王甲子清暑永安山甲戌博囉滿達海蘭河北八十戶

來附六月癸丑以西京留守耶律瑪魯為漢人行宮都
部署叅知政事楊佺出為武定軍節度使戊辰御清涼
殿放進士王棠等六十八人甲戌西北路招討使耶律
達嚕噶坐贓免官秋七月乙酉幽王蘇克薨戊子觀獲
乙未以北院宣徽使埒富為左伊勒希巴前南府宰相
耶律遜遜東北路詳袞丙申籍諸路軍丁酉如秋山辛
丑禁扈從踐民田丁未女直部長札木率衆來附加太
師八月癸丑高麗王欽薨遣使來告九月甲辰禁以置

網捕狐兔冬十月己酉駐蹕中會川十一月丁亥以南
院樞密使蕭孝友為北府宰相契丹行宮都部署耶律
仁先南院大王北府宰相蕭格同知北院樞密使事知
伊勒希巴事耶律信先漢人行宮都部署左伊勒希巴
埒富特哩袞漢人行宮都部署耶律迪里左伊勒希巴
已亥渤海部以契丹戶例通括軍馬乙巳賑南京貧民
十二月壬申曲赦徒以下罪是日為聖宗在時生辰

遼史卷十九

遼史卷十九考證

興宗重熙十年二月庚辰朔詔博囉滿達部歸哈斯罕
戶之没入者使復業 按部族表哈斯罕人戶没入
博囉滿達者索還復業係是年正月事

遼史卷十九考證